



Siverth K. Heilmann
Atassut

UKA 2021/86
19. oktober 2021

Timersorneq pillugu inatsimmi e-sport timi atorlugu timersuutitut allatuulli akuerisaanissaa pillugu Naalackersuisut inatsimmut allannguutissatut siunnersuuteqaqqullugit peqquneqarnissaannik Inatsisartut aalajangiiffissaattut siunnersuut.

(Atassutip Inatsisartuni ilaasortaataitai)

Uagut utoqqaliarsaalersugut inuusukkallaratta ilaana timersortarnikooqaagut. Timi peqqissoq anersaaq peqqissoq, naak taamanikkutuulli aalassaritsigiunnaaraluarlunga suli pingaartitaraakka. Sulilu pisinnaatillunga timi atorlugu nukiit atorlugit pinngortitamiinneq nuannarisaaqara.

Computerini spillit allallu ilitsoqqussarinngilakka, ilaanangilakka. Meeraallutami sisorangikkutta arsaanneq silami suut tamaasa pinnguaatit atorlugit meeqqeriveqaqqullugit immiut aliikkusersortaqaagut, peroriartornitsinnilu piniarneq aalisarnermillu perorsarneqartuarluta.

Ullutsinni atortorissaarutitigut qarasaasiakkullu ineriartorneq sukkangaarmat malinnaaffigiuminaappoq. Sunaaffa aamma meeqqat inuusuttunnguillu ullutsinni spillinik imak pikkoritsigilersimapput, periarfissagissaalersimapput allaat unammissutaasalersimallutik. Unnia aamma tamakkuninnga unammiauarneq aningaasarsiutaalertigisimavoq allaat inuussutissarsiutaalersimalluni.

Atassummiit inuussutissarsiutit nutaat tapersersortuarpagut aqutissiuusseqataajuarsimallutalu. Pissutsillu allanngoriartuaarnerat ilutigalugu tulluarsaasariaqarneq pisariaqalersarluni. Spillinillu unammiauarneq sunngiffimmiinnaq suliaajunnaarsimasoq paasillugu Aqqalu C. Jerimiassenip siunnersuutaa Atassummiit tamakkiisumik taperserparput.

Oqaaseq timersorneq, qallunaatut idræt, tassa timi atorlugu sukisaarsarneq, aalaneq aamma unammiauarneq imminik ajunngilaq, naak uunga siunnersuummut oqaaseq tulluarunnaarsimasutut ikkaluartoq isumaqarpugut ullutsinnut pissutsinullu nutaanut ikaarsaariarnissatsinnut periarfissatsialak atorluartariaqaripput.

Uanilu pineqartooq tassa sport, kalaallisut unammiaaarutit immaqaluunniit unammiauarneq atussallugu tulluarneruvoq. Oqaasermi taanna atussagutsigu, sorpassuarnik ammaassinerusussaavoq, soorlu, skak, allallu unammiaaarutaasinnaasut.

Piffissanngorpoq unammiaaarutit allat inatsisitigut oqaatsimut qanganitersimasumut ilaluarinnippalaarunnaarsillugit ilanngunneqarnissaat, siunissamilu qaninnermi inuusuttut piginnaanillit pikkorissorsuit allaat eSportimik inuussutissarsiornissaannut, aamma nunanut allanut unammersuariartornissaat tunngavigalugu, nunatsinniit pisortatigoortumik akuerisaasutut tunuliaqutserneqartutullu tapersersortariaqalerpagut.

Atassummiit pissutsinut nutaanut ammasuugatta siunnersuut tamakkiisumik
akuersaarlugu taperserparput.

